

ABSTRAK

Kajian ilmiah ini merupakan sebahagian daripada syarat untuk mendapat Ijazah Sarjana Muda Usuluddin. Penulis diwajibkan oleh pihak Fakulti Usuluddin untuk membuat kajian ilmiah dalam sebarang tajuk yang sesuai dengan bidang yang dipelajari.

Dalam kajian ini, penulis memilih tajuk yang membincangkan peranan atau langkah-langkah yang diambil oleh Jabatan Agama Islam Johor (JAIJ) dalam membasmi ajaran sesat di Johor.

Kajian ini berbentuk permasalahan sosio-agama yang bersangkutan dengan persoalan aqidah Islam. Setelah dikaji, didapati bahagian khas diperuntukkan untuk menyelidiki kesalahan yang berhubungan dengan persoalan aqidah seperti ajaran sesat ini. Untuk membincangkan persoalan ini, penulis telah membahagikannya kepada lima bab.

Di dalam bab pertama penulis menyentuh tentang pengenalan yang merangkumi beberapa aspek seperti objektif, bidang kajian, metodologi dan sistem penulisan. Metodologi ini berdasarkan kaedah-kaedah penyelidikan, pemerhatian, temubual dan penyelidikan perpustakaan. Penulis juga menceritakan masalah yang terpaksa dihadapi semasa menjalankan kajian ini di samping memperkenalkan JAIJ secara ringkas.

Dalam bab kedua pula penulis membicarakan tentang definisi ajaran sesat sebagaimana yang termaktub dalam Enakmen Pentadbiran Agama Islam Negeri Johor tahun 1978 dan menurut takrifan yang telah diberikan oleh Pusat Penyelidikan Islam, Jabatan Perdana Menteri. Dalam bab ini juga penulis telah membincangkan tentang unsur-unsur yang mempengaruhi gerakan ajaran sesat dan implikasinya terhadap umat Islam. Penulis juga menjelaskan tentang sejarah keminculan dan pengembangan ajaran sesat di Johor.

Manakala dalam bab ketiga pula, penulis membincangkan dan memberikan gambaran cara hidup beragama masyarakat Johor. Di sini penulis menjelaskan asal usul kedatangan Islam di Johor dan pandangan masyarakat terhadap alim ulamak. Dalam bab yang sama juga penulis telah menerangkan faktor-faktor yang mendorong masyarakat terpengaruh dengan ajaran sesat dan bahayanya kepada umat Islam. Di samping itu penulis telah membicarakan tentang kepentingan memerangi ajaran sesat ini berdasarkan kepada ayat-ayat Al-Quran di samping mendedahkan beberapa kumpulan ajaran sesat yang telah dikenalpasti oleh JAIJ.

Dalam bab keempat pula penulis telah mendedahkan dengan agak terperinci segala aktiviti atau tindakan yang telah diambil oleh JAIJ dalam usaha membanteras ajaran sesat di Johor. Di sini penulis telah membahagikan langkah-langkah yang diambil oleh JAIJ dalam pembasmian tersebut kepada dua bahagian, pertama langkah-langkah yang diambil

terhadap masyarakat dan keduanya tindakan yang diambil terhadap kumpulan ajaran sesat itu sendiri. Ciri-ciri am ajaran sesat juga terkandung dalam bab keempat ini.

Di dalam bab kelima, penulis telah membuat kesimpulan mengenai perbincangan yang telah dibuat dalam setiap bab. Dalam bab terakhir ini juga, penulis telah memberikan beberapa saranan yang dirasakan perlu kepada masyarakat, JAIJ dan kerajaan agar mengambil langkah-langkah yang lebih positif dalam usaha memerangi ajaran sesat yang semakin berleluasa dewasa ini. Dengan ini diharapkan segala usaha pembasmian dapat berjalan dengan jaya dan berkesan.